



Aningaasaqarnermut Naalakkersuisoq

Ulloq: 20. december 2018
J.nr.: 01.31.06/18-00828

Aningaasaqarnermut Akileraartarnermullu Ataatsimiititaliap pingasunngornermi ulloq 12. december 2018-imi aalajangiussaa pillugu Naalakkersuisunut ilisimatitsissut

Upernavimmi qulimiguulimmik sullissineq pitsanngortinniarlugu qulimiguulimmut inuttat ilaneqarnissaat pillugu ilassutitut aningaasaliinissamut qinnuteqaat

Naalakkersuisunit inassutigineqarpoq,

”- nunap immikkoortuani qulimiguulimmik angallassinerep patajaassuseqarnera nukittorsarniarlugu, Upernavimmi inuttat ilaneqarnissaat pillugu Air Greenlandimut isumaqatiginninniarnissaq akuerineqassasoq. 2018-imut aningaasartuutit 600.000-iupput kontumit pingaarnermit 20.11.70 Suliniutinut nutaanut sillimmatit, atugassanngortitsinikkut aningaasalersorneqassallutik.

kontumi pingaarnermi 20.11.70 Suliniutinut nutaanut sillimmatit, aningaasaliissutit 2018-imi 0,6 mio. koruuninik ikilisinneqassasut, aamma

kontumi pingaarnermi 72.20.05 Ilaasunik angallassinermut tapiissutit, aningaasaliissutit 2018-imi 0,6 mio. koruuninik amerlisinneqassasut.”

Aningaasaqarnermut Akileraartarnermullu Ataatsimiititaliap oqaaseqaatai apequtaalu:

Aningaasaqarnermut Akileraartarnermullu Ataatsimiititaliap ulloq 12 december qinnuteqaat manna pillugu isummernissani kinguartippaa tassungalu atatillugu pissutsit assigiinngitsut pillugit Naalakkersuisut itisileeqqullugit qinnuigalugit. Naalakkersuisut taakkununga akissutaat ataatsimiititaliamit ulloq 15. december tiguneqarput.

Ataatsimiititaliaq isumaqarpoq suliaq manna amigaateqartumik pilersarusiortoqarsimaneranik ersersitsisoq. Juullip tungaanut – kingornalu angallassinikkut pisariaqartitsinerup annertunerulernissaa tupaallaatissaagunangilaq, tamanna kaperlanneralu eqqarsaatigalugit atortulersuuteqarnikkut inuttalersugaanikkullu angallassisunut immikkut piumasaqaateqarpoq. Ajornartorsiutilliuku tamatuma nassatassaasa kingusippallaartumik eqqumaffigineqalersimanerat suliamut ilisarnaataasoq, ataatsimiititaliaq isumaqarpoq inuiaqatigiinnut naleqqersuunneqarsinnaanngitsumik akisoorujussuarnik iluarsiiisoqarnera aningaasaliissutissanut qinnuteqaatip kingusissukkt nassiunneqartup nassatarissagaa, peqatigitillugulu ajornartorsiutaasunik pitsaanerpaasumik iluarsiinissamut tapiutaanani.

Piffissami aggersumi suli kaperlakkallarnerani qanoq angallassinikkut pisariaqartinneqartut matussuserneqarnissaat Naalakkersuisut maannangaq isummerfigissagaat ataatsimiititaliap kaammattuutigissavaa, taamatullu 2019-ip naajartornerani iluarsiiissummik patajaatsumik aamma maanna pilersaarusiulereeqqullugit. Taamaalilluni 2019-ip naalernerani aningaasaliissutissanut qinnuteqaammik nukingiussamik assingusumik tigusaqarnissani ataatsimiititaliap naatsorsuutiginnilaa.

Suleqatigiissitamik angallassinikkut nunamut tamarmut atorsinnaasumik patajaatsumik iluarsiiisuteqarnissaq siunertaralugu kiffartuussinissamik isumaqatigiissutit ilusilerneqarsinnaanerannik misissuissussamik pilersitsinissaq siunertaralugu Naalakkersuisut siusinnerusukkut saqqummiussinikuusut ataatsimiititaliap maluginiarpaa. Naalakkersuisut suleqatigiissitap sulinerata killiffianik paasissutisseeqqullugit ataatsimiititaliamit qinnuigineqarput.

Aningaasaqarnermut Akileraartarnermullu Ataatsimiititaliap aalajangiinera

Qulaani allassimasutut oqaaseqaateqarluni apeqquteqarlunilu Aningaasaqarnermut Akileraartarnermullu Ataatsimiititaliap Naalakkersuisunit inassuteqaat **akuersissutigaa**.

Inussiarnersumik



Karl Kristian Kruse

Aningaasaqarnermut Akileraartarnermullu Ataatsimiititaliamut Siulittaasoq